

Date – 22/08/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Vairengte leh Sairang bakah Bairabi leh Kolasib inkar kawng chhia siamthat thuai phutin Kolasib Dist lirthei neitu ten vawiin atanga tiamchin awmlovin an dist chung kawngpui dan pin a ni ang.**
- 2. Aizawl Municipal Corporation Ward VI By Election atan tukin dar 7 atang khan vote thlak tan a ni .**
- 3. Prime Minister Narendra Modia chu nimin khan Poland khawpui Warsaw ah ropui taka lo hmuah a ni.**
- 4. India Meteorological Department chuan hmarchhak hmun thenkhatah tuna ruahsur nasa heavy rainfall aia nasa zawk extremely heavy rainfall a sur dawn niin a sawi**

<><><>

HIGHWAY BLOCKADE

Vairengte leh Sairang bakah Bairabi leh Kolasib inkar kawng chhia siamthat thuai phutin Kolasib Dist lirthei neitu ten vawiin atanga tiamchin awmlova helai kawngpui dan pin an tum chu chawhma dar 10 atangin tan an tum a,

Kolasib District Truck Owner’s Association (KDTOA) leh Kolasib Joint Action Committee (JAC) Co-ordination Committee chuan vawiin khan thuchhuah intawm siam in, Kolasib District huamchhunga Kawngpui pawimawh a chhiat avanga, kawngpui tha an neih thuai theihna atan leh Zoram mipuite harsatna sutkian thuai anih beiseina avangin NH-54/306/06 kawngpui te lirthei eng chi mah tlanlo turin an ngen tih an sawi a, Kawngpui dan pin a nih avanga mipuiten harsatna an tawh loh nan sumdawngtuten an thil zawrh te a man bithliah pangngai aia to in tuman hralh lo turin an ngen bawk.

Road Block huaihawt tur hian khawchhunga lirthei vei vak te a huam dawn lo an ti a, Kawngpui dan pin hian, Dan leh thupek kengkawhtu Force leh Magistrate te, Medical duty te, zirlai naupang hruaitu lirthei te, PHE leh P&E depts a thawktute, Special case (damloh leh chhiat tawh te leh a dang te) chu an awmna Branch YMA President/Secretary hriatpuina lehkhah nei te, Press mite, Wifi & Network provider te leh Kawngpui chhe siamtute a huam dawn lo a ni, an ti.

Hetihlai hian kawngpui danpin tumtu lirthei neitu pawlte leh Kolasib District Magistrate Pu Robert C. Lalhmangaiha te nizan khan an inkawm a ni.

<><><>

PMJVK

Finance changtu Chief Minister Pu Lalduhoman sorkar laipui scheme - Pradhan Mantri Jan Vikas Karyakram PMJVK kaltlanga tun sorkarin sum a la dawn loh chhan chu sorkar hmasa huna hna inpek thawh zawh loh tam lutuk vang a ni tih nimin Assembly thutkhawmah a sawi.

House Leader Pu Lalduhoma chuan PMJVK chu minority te tana ruahman a ni a ti a, a tirah hmun thenkhat hman theiloh mahse tunah chuan state puma hman theih tura ruahman ani tawh tih sawiin a guidelines ang chuan zaa 80 chu zirna leh hriselna atana hman tur tih niin sawrkar hmasa ah za a za sports ah a kal a ti a, District Committee kaltlang loa hnathawh a tam hle tih sawiin diklo taka hna inpek tam tak a awm a ti.

Hetihlai hian sorkar hmasaa Sports Minister Pu Robert Romawia Royte MLA chuan sorkar hmasaa a dept chan Sports leh ICT in project an siamthiam avangin anni project chauh a tlang chu lawmpui tura a duh thu a sawi a, tuna PMJVK sum hi state sorkar in a hmuh sa a release loh vang niin a sawi bawk.

District Council & Minority Affairs Minister, Pu C Lalsawivunga chuan zawhna a chhanna ah Sorkar hmasa in PMJVK hnuaia project engemawzat a buatsaih sa te chu sorkar tharin umzuiin, sorkar laipui ah thehluh thlak vek a ni tawh tih a sawi a. Project Proposal 64 sorkar laipui ah an thehluh tawh a, tun Sorkarah PMJVK sanction thar hmuh a la nih loh thu leh PMJVK scheme atanga Vanapa Hall sakna tur cheng nuai 3700 a ruahman chu sorkar laipuiin a la ti fel lo tih a sawi a. PMJVK kaltlanga hmalakna te chu ram tan hmasawna ruhrel pawimawh dinna a nih avangin state sorkar chuan zaa 10 a tum ve tur chu pek chhoh zel a tum tih a sawi bawk.

<><><>

RAIN HAVOC

Khawcheng karah naupangte an him zawk nan vawiin hian Aizawl District-ah zirna in te a ni thum nan khar chhunzawm a ni a. Indian Meteorological Department in khawchin a thlirlawknaah ruah la sur zui tura a hmuh avangin school naupang te an him zawk nan district Bawrsap hian zirna in khar a nih thu thuchhuahah a siam a ni.\

Tunhnai Ruahsur nasa hian khawsak phung ti khaihlak nualin, Aizawlah chuan leimin a awm nuala, nimin atang khan kawngchhak kopang min avanga leimin in hmun thenkhatah harsatna thlenin, a thenfai hna thawh zui nghal a ni a, hmun thenkhatah chuan kawngpui helna tur ruahman a ni bawk.

<><><>

HOME MINISTER

Home Minister Pu K. Sapdanga'n kum 2022 atanga kumin inkarah Jail tang tlanchhuak mi 56 an awm a ti a, heng zingah hian man leh mi 25 awmin mi 31 erawh man an la ni lo a ti.

He thu hi Assembly Session thutkhawma zawhna ziaka a chhanna ah sawiin Home Minister chuan tun dinhmunah Mizoram Jail hrang hrangah tang

mi 1807 an awm mek a ti a, Aizawl Central Jail, bakah District Jail hrang hrang 7 te chu thawm that tura hmalak mek a ni a ti bawk.

Home Minister chhanna atanga lan danin Jail tang mi 56 tlanchnhuak zingah hian Jail atanga tlanchnhuak mi 33 an awm a, Court atanga tlan chhuak 7 awmin Damdawiin atanga tlanchnhuak 8 an awm a, Police motor atanga tlanchnhuak 7 leh Prison Ambulance atanga tlanchnhuak 1 an awm bawk.

Sawrkar chhinchhiah danin kum 2022 ah tang tlanchnhuak 17 awmin Aizawl District atangin mi 11, Champhai atangin mi 3 leh Lunglei atangin mi 2 an awm a, Siaha District atangin tlanchnhuak pakhat a awm bawk.

Nikum kum 2023 ah tang tlanchnhuak 29 awmin Aizawl District Jail ah tlanchnhuak 7 an awm a, Lunglei ah mi 6 awmin Serchhip leh Champhai ah te 3 ve ve an tlanchnhuak a, Siaha ah 5 tlanchnhuakin Kolasib leh Lawngtlai ah tlanchnhuak pakhat ve ve an tlanchnhuak a, Women's Jail Aizawl atangin 3 an tlanchnhuak bawk a ni.

Kuminah tun thla August thlenga sawrkar chhinchhiah danin tang tlanchnhuak 10 an awm tawh a, tlanchnhuak te hi Aizawl District Jail atangin 7 awmin Serchhip District Jail atangin 2 an awm a, Kolasib Jail atangin pakhat a tlanchnhuak tawh bawk a ni.

Kum 2022 atanga kum 2024 inkara tlanchnhuak zingah hian Aizawl District atanga tlanchnhuak mi 8 te chu man an ni tawh a, Siaha atangin mi 6 man niin Lunglei atanga tlanchnhuak mi 3 man ni a, Champhai, Serchhip leh Women's Jail atanga tlanchnhuak mi 2 man tawh niin Lawngtlai leh Kolasib atanga tlanchnhuak mi 1 ve ve man an ni tawh a, an vaiin mi 25 man ni tawh a ni.

<><><>

CM

Chief Minister Pu Lalduhoma'n sawrkarna an chelh atanga kumin June thla inkarah Mizoram Sawrkarin loan cheng vbch 909.85 a puk tawh a ti.

He thu hi Assembly thutkhawma Lawngtlai West bialtu MLA Pu C. Ngunlianchunga zawhna ziaka a chhanna ah sawiin Chief Minister leh Finance changtu Pu Lalduhoma chuan sawrkar thar lakluh ni december ni 8, 2023 atanga kumin June thla inkarah Mizoram sawrkarin cheng vbch 909.85 a puk tawh a ti a, heng a pukna te hi Open Market Borrowing (OMB), National Bank for Agriculture and Rural Development (NABARD), Externally Aided Project (EAP) atangin leh Scheme for Special Assistance to States for Capital Investment (SASCI) te atangin a ni tih a sawi.

Chief Minister chuan state sawrkarin sum a puk thin chu state sawrkar sum indaihlohna hrang hrang leh revenue expenditure te leh leiba rulh mek nan hman thin ani tih a sawi bawk.

<><><>

AMC WARD VI

Aizawl Municipal Corporation Ward VI By Election atan tukin dar 7 atang khan vote thlak tan a ni a,

AMC Ward-VI bialtu corporator Pu John Zosangliana Ralte, a thih avanga a hmunruak hnawhkhah na atan by election hi neih a ni a, he inthlanah hian kil 3 atangin an inbei dawn a, ZPM official Candidate atan Pu H. Lalremtuanga dah a ni a, Congress leh MNF Party chuan Independent candidate Pi Lalrinfeli an thlawp a, Pu John Zosangliana Ralte nupui a ni. BJP Mizoram chuan an party gen secy Pu Chawngmingthanga an dah a ni.

Ward-VI ah hian Chanmari West, Hunthar Veng leh Edenthlar Vengte a awm a. Electoral Roll thar berah Elector 9901 -mipa 4601, hmeichhia 5300 an awm a ni.

<><><>

MSCPCR

Mizoram State Commission for Protection of Child Rights din a nih hnuah thubuai 43 ziah luh a ni tawh.

Kum 2018 a Mizoram State Commission for Protection of Child Rights (MSCPCR) din a nih hnuah thubuai 43 ziah luh a ni tawh a, kum 2023 khan thubuai ziahluh hi tam berin 12 ziah luh a ni a. Heng zingah hian naupang enkawl leh humhimna dan bawhchhiatna tam berin The Juvenile Justice (Care & Protection of Children), Act hnuai thubuai 23 ziah luh a ni a, naupang kum tling lo laka mipat hmeichhiatna hmansual avanga dan bawhchhiatna thubuai 12 awmin hei hi The Protection of Children from Sexual Offences (POCSO) Act hnuai thubuai ziahluh a ni thung.

Hemi bakah hian The Right of Children to Free and Compulsory Education (RTE) Act hnuai thubuai ziahluh 6 awmin, Child Health thubuai 1 leh The Child and Adolescent Labour (Prohibition and Regulation) Act hnuai case 1 a awm bawk a ni.

<><><>

ASF

AH&Vety Department changtu Minister Pu C. Lalsawivunga'n kumin January atanga August ni 15 inkarah vawk pul hri African Swine Fever avangin vawk 9866 an thi tawh a ti a, vawk 17977 suat an ni tawh tih a sawi.

He thu hi Assembly a zawhna ziaka a chhanna ah sawiin Pu C. Lalsawivunga chuan kumin January atanga August ni 15 thlenga vawk thi leh suat avanga sum hloh zat chu cheng vbch 239 nuai 45 a ni a ti a, vawk hri ASF avanga hloh hi kum 2021 atanga 2022 inkarah cheng vbch 334.14 ani a ti a, kum 2022 atanga 2023 inkarah cheng vbch 210.32 ani tih a sawi.

Minister chuan kum 2021 leh 2022 inkarah vawk thi 33417 awmin vawk suat 12568 a awm a ti a, kum 2022 atanga kum 2023 inkarah vawk thi 12795 awmin vawk suat 11685 a awm tih a sawi bawk.

Minister chuan State pawn atangin vawksa lakluh thin ani tih sawiin Pune, Maharashtra atanga lakluh thin ani a ti a, State pawn atanga vawksa lakluh chu dan hmanga khap theih ani a ti bawk.

<><><>

PM

Prime Minister Narendra Modia chuan nimin khan Poland khawpui Warsaw a thleng a. Warsaw Military Airport ah ropui taka lo hmuah a ni a. A thlenna hotel-ah Warsaw-a India mi chengten an lo lawm bawk a. Pu Modia hian Jam Saheb Nawanagar Memorial ah pangpar dahin Monte Cassino leh Kolhapur Memorial a tlawh bawk a ni.

Prime Minister Narendra Modia hian Poland leh Ukraine a tlawh dawn a. A thlawhchhuah hmain PM Modia chuan thuchhuah siamin Poland chu Central Europe-ah eibar zawinna lama India thawhpui tha tak a ni a ti a. India leh Poland chuan mipui rorelna democracy leh midang pawmthiamna avangin an inlaichinna a tha em em a ni a ti. Pu Modia chuan Poland leh India inlaichinnain kum 70 a tling ta chu lawmawm a tih thu sawiin a Prime Minister leh a thian ni bawk Donald Tusk leh President Andrzej Duda te hmuh a beisei a ti bawk.

Ukraine a tlawh tur chungchangah PM Modia chuan Ukraine President Volodymyr Zelensky sawmnaa zin tum anih thu a sawi a. Tun tum hi India Prime Minister zingah Ukraine tlawh hmasa ber a ni ang.

<><><>

IMD RAINFALL

India Meteorological Department chuan hmarchhak hmun thenkhatah tuna ruahsur nasa heavy rainfall aia nasa zawk extremely heavy rainfall a sur dawn niin a sawi. Assam, Meghalaya leh Tripura-ah te chuan ni hnih chung ruah hi tam tak a sur dawn a. Hetihlai hian Uttarakhand, Jammu, Kashmir, Ladakh, Himachal Pradesh, Uttar Pradesh, East Rajasthan, Punjab, Haryana, leh Delhi ah te chun ruah tam vak lo a tla dawn a. Madhya Pradesh, Konkan, Goa leh Gujarat ah te ni sarhi chung ruah a sur nasa dawn niin a sawilawbawk a ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 113-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>